



17 Maret 2021

Ogen: Jeremia 49:1-39



Pasu-pasu Kenca Ndatken Ukumen



Enterem kalak erpengakap maka Dibata "menganak emasken" Israel i badingken ras bangsa si deban. Tapi adi njelimet kita ngoge Pustaka Si Badia maka labo pernah ilakoken Dibata si bage. Dibata tetap bagi Dibata, la pernah mobah i bas keleng ate, keadilan ras kebujuerenNa. Erdandanken si e maka kai si ilakokenNa man Israel e ka nge si ilakokenNa man man bangsa si deban. Kai si ilakokenNa man bangsa si deban e ka nge si ilakokenNa man bangsa Israel. Umpamana adi Israel erdosa la pernah la iukum Tuhan. Salah sada ukumen si idabuhkanNa eme mbuang bangsaNa ku Babil pitu puluh tahun.

Bage ka me si jadi man bangsa si deban. I bas ogenta sendah ituriken Jeremia kerna ukumen-ukumen si bakal jadi man bangsa sekelewet Israel eme Kalak Amon ras kota-kotana kerina, bage pe kalak Edom ras kerina kota-kotana. Pasti kalak enda kena ukumen si rehna i bas Dibata nari. Saja bedana ras Israel eme maka bangsa enda lenga itandaiNa Dibata si mere ukumen e man bana. Janah enda me arusna jadi dahin kalak Israel maka ia ipilih Dibata guna jadi terang man bangsa-bangsa.a

Amin gia lit ukumen i bas dosa-dosa bangsa enda maka bagi bangsa Israel adi kune jera ia, reh mis perkuah ate Dibata guna ngalemi dosa-dosana janah masu-masu kegeluhenna. Bage ka me si jadi man bangsa-bangsa sekelewet Israel ndai maka ijanjiken Tuhan mereken kemakmuren mulihi man bana rikutken pertimbangan ras keadilan Tuhan. Adi sipergermetken, labo sindauhi pengalamen geluhta ras bangsa-bangsa siisuratken ibas renungenta enda. Emaka kita pe kerina ngadiken erbahan dosa maka reh perkuah ate Tuhan ku bas kegeluhenta kerina.

